

Tutu e táxnūu San Júdā

Taxnūu Júdā ntiusi

¹Xu'u e Júdā ú ne, ña kade tsiñu iña Jesúcrístú u, ni ění Santiaú u. Taxnūu ú tutú sa'a iña un ntíí ntíí ña'a, ña e kána Xuva kō tsi dóo kuínima ñá ña, ña é ñū'u nta'a Jesucristu. ²Na ntuntā'ví ini Xuva ko ntō. Na tā'xi ña e dóo va'á koo kuntoo nto nī e dóo kuinima ñá nto.

Ña ntánañē'é dovete

(2 Pedro 2:1-17)

³Ntō'ó ení ko e dóo ntio kó, dōo ntio kó taxnūu u tú'un iña nto nté ō nakáku o nta'a Xuva kō. Ntá tsi sá'a kantio ko é ká'án u ni nto ve, tē koó ntii nto nada'an ntō tú'un e kuínti'xe nto, ðivi tsi tú'un é uun ito tsi xé'e Xuva kō é kūtuni ña ntáduku ntée ña. ⁴Tsi iō ñá'a e nták'í'vi xu'u ña mi ntánataká nuu ntó, ðivi ñá é nte dí'na uve na'a kaká'an tú'un Xuva ko iña ña tsí da mii é ni'í ña é ntō'o ña. Ntáka'an ña tsí da xé kade ka'nu iní Xuva ko ni ko kuétsí kō ne, kuvi vii o da nēé ka nuu i é kīni kaa. Ntáka'an ntée ña Xuva ko nī Tó'o ko Jesúcrístu, ntáka'an ña tsí ña te nuu é ntaā i é Xuva ko ñā.

⁵Ntio ko é na nānu'u ntó iní nto ve, kuān te nte éma tsi ini vá'a nto

tsí Xuva kō ne, nákākú ña un ntíí ntíí ña Israeé san dā nantii ña ña ñuú Egitó ne, ntá tsi da rkontúví nantí'í ña ña'a san, ña é ña ni kuínti'xe i. ⁶Io ánje ði é ña ni de ntáa ña tsiñu ña, tsí xtuví mii ña mí káduku ntée ña. Nátsu'un kutu Xuva ko ñā mi dóo nee un tsi da nté xee ntúvi é xntēkú ku'vē ñá iña ñúxivi sa. ⁷Kuan ō kúvi nī ña ntoo ñuú Sodomá, ni ñūú Gomorá, ni tūku ñuu é ntoo etsin íkán ði. Nā te da ðii nuu i é kīni ntaa de ñá ni ñadī'í san. Dōo dé ña é kīni kaa ni tuku ñatíí san ði. Un vá'a tsi ntánto'o ña ve mí kai'xi ñū'u ntii ðañu ntúvi. Koto nto ña vata koo é ña kuan koo víi nto vatā o dé ña.

⁸Ña kīni ntáa san, ña é ntoo ni'í ntō né, kuān ó de ña ði, tsí vata tsi tē ñuu éni kán ntoo ña, ntáde ña ni kúñu ñā nuu i é kīni ntáa. Ña ncho kuínti'xe ña Xuva kō ne, ntáka'an kīni ña iña ña ntáde tsiñu e dukún kán. ⁹Ntá tsi ánje, ña odo nūu san, ñá nani Migeé ne, dā ntánāa núu ña nī tó'o e ña vá'ā san kuenta iña kúñu Muisee dá xi'í ñá ne, ñá ni kene iní ña é ká'an ña tú'un é kīni kaa ni ñā, tsí da mii tsí é káka'an ña: “Xuva ko na tā'xi ña o é ntō'o o”, ka'an ña. ¹⁰Ntá tsi ña sá'a ne,

dōo kinī ntáka'an ña iña un ntíí ntíí nuu i é ña íni ña. Ntá tsi nuu i é íni kúñu ña, vatā ó ini kiti sán ne, núu i sá'a e ntánakunaa tsí mii ña kúñu ña.

¹¹Íña ntá'vi de ntu ña kuān ntáa san! Ntáde xení ña ni tā'an ñá vatā o dé Caiín san. Ntáde ña vatā o dé Balaán san, ña é doto tsi ide vata koo é ni'i ñá diu'un. Ntáka'an ntée ña ña odo nūú iña ñá vatā o dé Coreé san ne, kuān koo ni'i ñá doxi'í san di. ¹²Dōo kinī o ntáde ña kuān ntáa san da ntánataká nuu nto é ká'xí dadíí nto ni tā'an nto da ntáde nto viko é kuinima tá'an kō. Ña sá'á ne, ña te ntákuka'an nuu ña e dōo kuē'e ntaído ña é ká'xi mii ña ne, ña te ntáde ña kuenta te xee tá'an é ká'xí ta'an ña. Vata ntáa viko nu'u é ña te kakíin daví san, e dá kantavá ni tásín san, ntáa ña. Vata ntáa utun é ña kakíi kiti i ntáa ña. Vata ntáa utun é xi'í kue'len ne, kítú'un dítsin i ntáa ña di. ¹³Vata ntáa ntute ñū'u e dōo kaido ntáa ña. Ntaéte xaa ña nuu i é kīni kaa e ntáde ña vatā ó kaeté xaa ntute ñū'u san tiñu i. Vata ntáa xntívi e ntaíka xaa ntáa ña, é kī'in ña é kuntōo ña mí e dōo nee kue'én san ntii dañu ntūvi.

¹⁴Enoo, i'xá ika Ādaán san é kuvi ū'xe ne, kaka'an ñá naa Xuva ko dá káka'an ña iña ñá sa'a kídaa: "Íni u tsi vé'xi Xuva ko, ni ñá te da dii da díí míil ánje ña. ¹⁵Xntékú ku've ñá iña un ntíí ntíí ña ntántoo ñuxiví sa. Ka'an ña tsí un ntíí ntíí ña é kīni ntáa san ni'i ña é ntō'o ña kuenta iña i é un ntí'í é kīni kaa é edé ña, vatā ó ntio nima kīni ntáa ña. Ní'i ñá é ntō'o ña iña tú'un é kīni ntáa é

ka'an kīni ña iña Xuva kó di", ka'an ña. ¹⁶Ña sá'á ne, é un ntí'í ntátsi'í kuétsi ña. Ntáka'an ntée ña da nēé ka ntí'í nuu i. Da mii tsí é ntio ña é káde kueni kīni káa ña. Ntáka'an ñá tsí dōo ka'nu ña'a ña. Kaka'an va'á ña ni ñá'a san dá kataan nuu ña.

Nté koo vii ña ntákuinti'xe i san

¹⁷Ntá tsi ñi'vi nto, tā'an kó e dōo ntio kó, naka'an nto tū'un e ntáka'an pústru Tó'o ko Jesūcristu ¹⁸da ntáka'an ñá ni ntō: "Tē xee ntūvi é doko sa ntí'í ñuxiví sa ne, kī'xi ña ntánarkánteē ñá nuu i é vā'a. Vii ña vatā ó ntio nima kīni ntáa ña", ka'an ña. ¹⁹Ña sá'á ne, ntáde ña é nāa núu ña ntákuinti'xe i san ni tā'an ña. Ntáde ña vatā ó ntio nima kīni kaa ña, tsí ña tuvi Espíritū Sántū san nuú nima ña.

²⁰Ntá tsi ñi'vi nto, tá'an ko e dōo ntio ko, díí díí ka kutú've nto iña Xuva ko vata koo é díí ka vá koo kuinti'xe nto ña. Kantá'vi ntó vatā ó kaxntii Espíritū Sántū san nto é ká'an nto. ²¹Kuinimá ka nto Xuva ko vatā ó kakuinima ñá nto. Kuntetu nto ntuvi dá ta'xi Tó'o ko Jesūcristu é kuntuo o ni ña ntii dañu ntūvi, tsí kantuntā'ví ini ña kō.

²²Na ntu ntá'ví ini nto ña'a, xoo é vāta kuinti'xe vá'a i. Ká'an nto ni ña te kuinti'xe ña é nuu é ntaa i. ²³Ío tuku ña'a ne, nakákú nto ña, natavá ntó ña mé'ñū ñū'u. Na ntuntā'ví ini nto ña, kuān té nte ña ncho tiin ntá'a nto dōo ña é kudentu ni nūu i é kīni ntáa e ntáde ña. Koto nto tē ña kuan koo vii nto vatā ó de ña.

Ká'an o tsi dōo ka'nu Xuva kō

²⁴Tō'ó kō né, na xntii ña ntō vata koo é ña kó'xo nto nuu i é kīni kaa.

Na ntāvá'a ña nima ntó vata koo é ña tuví ka kuétsi nto tē xee ntó nta'a ña. Ñá tē nté kaa ka'nu kuinī nto te íni nto ña, é un tsi kaxi'í nuu ka'nu ña. ²⁵Uun tsi Xuva kō e dóo ki'in inī ña. Dívi ñā é nakáku ña ko kuēnta iña Tó'o ko Jesūcristu. Ká'an

ō tsi dóo va'á ña, tsi dóo ka'nu ña'a ña. Ká'an ō tsí dívi ñā é odo nuū ñá kade kú'vē ña, tsí kivi víí ña é un ntí'í. Kuan ō dé ña nte dí'na ne, kuān ó de ña vevíí dī ne, kuān koo víí ña ntii dañu ntūvi. Kuan tsi koo é ká'an u ni ntō.